

## UNIDADE 3

# Normas mercantís

## Índice

---

1. Introducción ao Dereito. O Dereito Mercantil.
  - 1.1 Introducción ao Dereito.
  - 1.2 Normas que regulan a vida da empresa: O Dereito Mercantil.
2. A propiedade industrial e os signos distintivos da empresa.
3. O Rexistro Mercantil.
4. A forma xurídica da empresa.
  - 4.1 O empresario individual.
  - 4.2 As sociedades.
    - 4.2.1 Clases de sociedades.
    - 4.2.2 Aspectos comúns ás sociedades.
5. A sociedade colectiva.
6. A sociedade comanditaria: simple e por accións
7. A sociedade anónima (S.A.)
8. A sociedade de responsabilidade limitada (S.R.L. ou S.L.)
9. Sociedade Limitada Nova Empresa (SLNE)
10. As sociedades laborais (S.A.L. e S.L.L.)
11. As sociedades cooperativas (S. Coop.)

## Presentación

---

As empresas teñen regulada a súa actividade mediante normas que teñen que cumprir obrigatoriamente.

Neste tema estudaremos as normas de Dereito Mercantil. No tema 5 tamén estudaremos outras ramas do dereito que inflúen na vida da empresa: o Dereito Laboral e o Dereito Fiscal.


Dentro do Dereito Mercantil faremos referencia, en primeiro lugar, á lexislación sobre a propiedade industrial e despois detallaremos as características dos distintos tipos de sociedades. As sociedades colectivas e a sociedades comanditarias teñen hoxe pouca importancia polo reducido número que hai destas empresas. Sen embargo, o seu estudo é interesante para comprender mellor aos outros tipos de sociedades: anónima, limitada, laborais, cooperativas e S.L.N.E.

## 1. Introducción ao Dereito. O Dereito Mercantil.

### 1.1. Introducción ao Dereito.

O Dereito xorde para limitar as liberdades de forma regulada, co obxecto de mellorar a convivencia.

Pode definirse como unha serie de **normas e principios** (escritos ou non) que, coa idea de xustiza, **regulan a convivencia** e poden ser **impostos pola forza**.



Clasificación do Dereito	
Dereito privado (Regula relacións entre axentes privados)	Dereito Público (Regula a actividade dos axentes públicos entre si e cos particulares)
<ul style="list-style-type: none"> <li>- Civil.</li> <li>- <b>Mercantil</b>. (Empresas).</li> </ul>	<ul style="list-style-type: none"> <li>- Constitucional</li> <li>- Administrativo</li> <li>- Penal</li> <li>- Comunitario (Unión Europea)</li> <li>- <b>Fiscal o tributario</b></li> </ul>
- Internacional (pode ser público ou privado)	
- <b>Laboral ou do Traballo</b> (participa de ambos os dous tipos).	

### 1.2. Normas que regulan a vida da empresa: O Dereito Mercantil.

O Dereito Mercantil é a rama do dereito que regula as relacións económicas entre as persoas cando unha é unha empresa. Regula pois a actividade comercial, a actividade das empresas.

Hai moitas normas mercantís. Esta é unha rama do dereito en constante evolución por lo que está suxeita a frecuentes cambios. Recollemos a continuación unha lista de normas mercantís que, sen pretender ser exhaustiva, inclúe as máis importantes:

- **Código de Comercio.** É a lei básica do Dereito Mercantil. O código é de 1885 modificado varias veces con posterioridade.
- **Lei de Competencia Desleal e Lei de Defensa da Competencia.** A Constitución Española reconece a liberdade de empresa no marco dunha economía de mercado. Un dos piares máis importantes dun sistema económico de mercado é garantir a libre competencia entre as empresas. Estas leis tratan de asegurar boas prácticas empresariais, evitando a espionaxe industrial, accións colusivas (como poñerse de acordo para fixar prezos), dumping, comportamentos que poden inducir a error aos consumidores,...
- **Lei de Patentes de Invención e Modelos de Utilidade e Lei de Marcas.** Protexen á propiedade industrial.
- **Plan Xeral de Contabilidade.** Regula como ha de ser a contabilidade da empresa.
- **Outras leis:**
  - Sobre sociedades: Lei de Sociedades Anónimas, Lei de Sociedades Limitadas, Lei das Sociedades Laborais, Lei de Cooperativas, Lei de Cooperativas de Galicia, Lei da Sociedade Limitada Nova Empresa ...
  - Lei Xeral para a Defensa dos Consumidores e Usuarios.
  - Lei Xeral de Publicidade.
  - Lei Orgánica de Protección de Datos de Carácter Persoal.
  - Lei de servizos da sociedade da información e de comercio electrónico.

Ademais das normas nacionais e autonómicas tamén hai no ámbito mercantil, normas comunitarias (da Unión Europea), xa que se trata de acadar un mercado único.

## 2. A propiedade industrial e os signos distintivos da empresa.

A innovación permite avanzar ás empresas e á sociedade. As normas que protexen aos investimentos e os esforzos innovadores é a **Lei de Patentes e a Lei de Marcas**.

A **Propiedade Industrial** é o conxunto de dereitos que se protexen ao crear un invento, unha marca ou un deseño industrial.

A propiedade industrial e protéxese co dereito de **explotación en exclusiva**. Isto significa que se impide a outros o uso, fabricación ou comercialización sen o seu consentimento. Este dereito correspóndelle ao ser o primeiro en rexistrar esa propiedade industrial nun organismo público chamado **Oficina Española de Patentes e Marcas** (OEPM).

Pódense rexistrar na OEPM :

- **Patentes.** Invencións novas que poden ser novos produtos ou aparatos, novos métodos de produción ou novos procedementos de obtención de produtos. As patentes teñen unha duración limitada (de 15 a 20 anos).
- **Deseño industrial.** É un conxunto de liñas ou cores, é dicir, un debuxo de novas formas de presentación física de bens. Son aspectos ornamentais. A duración é tamén limitada (5 anos prorrogables ata 25).

- **Signos distintivos** das empresas: Serven para diferenciar e distinguir a unha empresa, a súa actividade e os seus produtos dos de outras empresas competidoras.

**Marcas.** Unha marca é o signo que distingue a un **produto** doutros similares. O **logotipo** é unha mensaxe abreviada que facilita a identificación da marca e pode consistir en palabras, gráficos (debuxos), ou en palabras e gráficos no mercado.


**SONY**



**Nomes comerciais.** O nome comercial dunha empresa é o signo que a identifica e a distingue das súas competidoras no tráfico mercantil. Como nome comercial pódense usar nomes, anagramas, logotipos, imaxes, ... que se poidan asociar á actividade empresarial desenvolvida.

A imitación das marcas ou dos nomes comerciais considérase un comportamento desleal e é perseguido pola Lei. As marcas e os nomes comerciais pódense protexer, de forma indefinida, sempre que se renoven por períodos de 10 anos.

**Rótulos de establecemento.** É o signo ou denominación que serve para dar a coñecer ao público un local e para distinguilo de outros. A diferenza da lei anterior, a vixente Lei de Marcas renunciou a recoñecer ao rótulo como un signo distintivo **susceptible de rexistro** e as únicas disposicións que lle dedica son de carácter transitorio, para manter a vixencia dos rótulos rexistrados con anterioridade.



Para a protección xurídica dos signos distintivos, a OEPM concede Marcas de produtos ou servizos e Nomes Comerciais. Os Rótulos de establecemento xa non poden ser rexistrados.

### 3. Rexistro Mercantil.

O **Rexistro Mercantil** é un organismo público, dependente do Ministerio de Xustiza que cumpre a misión de ser un instrumento de publicidade legal. Contén todos os datos e información sobre as empresas para que sexan coñecidos por calquera interesado e en calquera momento: contén **información veraz e é de acceso público**.

No Rexistro Mercantil correspondente ao seu domicilio pódense inscribir todas as empresas; para o empresario individual é potestativo e para as sociedades é obrigatorio. Como veremos na seguinte pregunta, no momento de inscribirse as sociedades no Rexistro Mercantil, estas adquieren personalidade xurídica, convértense en persoas con dereitos e obrigas.

En Galicia hai 5 rexistros mercantís; un en cada capital de provincia e outro en Santiago.

## 4. A forma xurídica da empresa.

O primeiro paso que se debe dar ao crear unha empresa, é decidir se quen vai ostentar a súa titularidade vai ser unha **persoa física** (ou empresario individual) ou unha **persoa xurídica** (ou sociedade mercantil). Neste último caso, terase que optar por aquel tipo de sociedade que se considere máis conveniente para cumprir o fin ou o obxectivo da devandita empresa.

Clases de empresas segundo a forma xurídica:

Empresario individual	A empresa ten un só propietario que é unha persoa física
Sociedade	A empresa ten varios propietarios

### 4.1. O empresario individual.

O empresario individual é aquela **persoa física** que, contando coa capacidade legal necesaria (maioría de idade, libre disposición de bens, etc.), exerce de forma habitual e por conta propia unha actividade comercial, industrial ou profesional.

As **características** máis importantes do empresario individual son:

- ▶ **Responsabilidade ilimitada** (responde con todo o seu patrimonio persoal das débedas xeradas na súa actividade).
- ▶ Os beneficios obtidos pola actividade tributan a través do **Imposto da Renda das Persoas Físicas (IRPF)**.
- ▶ O empresario dirixe persoalmente a súa xestión polo que ostenta o **control total** da actividade.
- ▶ Esixe moi **poucos trámites** para iniciar a actividade e son máis alcanzables que noutras formas xurídicas.
- ▶ É unha forma empresarial axeitada para as microempresas.
- ▶ A súa inscrición no Rexistro Mercantil é voluntaria.

### 4.2. As sociedades.

A empresa sociedade é un tipo de empresa con personalidade xurídica, é dicir, que ten unha personalidade distinta á dos seus propietarios

#### 4.2.1. Clases de sociedades

As sociedades pódense clasificar en sociedades mercantís e sociedades de interese social.

Para elixir a forma xurídica teranse en conta varios **criterios**:

- O volume de recursos iniciais necesarios.
- O número de participantes no negocio, o número de socios.
- As responsabilidades que socios están dispostos a asumir: A obriga de responder das débedas que a empresa teña pola súa actividade pode alcanzar

ao capital (responsabilidade limitada) ou abranguer tamén os propios bens persoais dos socios (responsabilidade ilimitada).

- Existencia legal nalgúnhas actividades: Existen algunhas actividades para as que a lei esixe uns requisitos específicos ou unha forma xurídica concreta, así sectores como a banca ou seguros esixen por lei a forma xurídica de S.A.
- Aspectos fiscais: En canto á súa tributación, todas as sociedades tributan no Imposto de Sociedades polos beneficios obtidos. As laborais e cooperativas teñen beneficios fiscais.

▪ **Sociedades mercantís:**

Unha sociedade mercantil está formada por un grupo de persoas (socios e socias) que poñen en común bens e/ou diñeiro para conseguir uns obxectivos. Xeralmente o obxectivo principal é conseguir beneficios.

Ter **ánimo de lucro** é, polo común, o obxectivo principal. Os obxectivos que se pretenden alcanzar son os motivos polos que os socios fan as súas achegas.

As sociedades mercantís clasifícanse en sociedades personalistas e en sociedades capitalistas.

As sociedades **personalistas** son as que a xestión correspóndelles aos socios polo que é importante quen son os socios e as súas características persoais.

Nas sociedades **capitalistas** non importa tanto quen é o socio se non o capital que achega. Nestas sociedades a xestión non ten por que recaer nos socios, poden contratar a xestores profesionais.

▪ **Sociedades de interese social ou sociedades non mercantís:**

É un tipo de sociedade que non pretende obter un beneficio se non satisfacer as necesidades comúns dos seus socios. Son as cooperativas.

<b>Sociedades mercantís</b>	<b>Personalistas</b>	Sociedade Colectiva
	<b>Mixtas</b>	Sociedade Comanditaria: - Sociedade Comanditaria simple - Sociedade Comanditaria por accións
	<b>Capitalistas</b>	Sociedade Anónima Sociedade Limitada Sociedade Limitada Nova Empresa Sociedades Laborais
<b>Sociedades de interese social</b>		Sociedades cooperativas

Para comprobar a importancia dos distintos tipos das formas xurídicas:

Número de empresas por forma xurídica (Ano 2008)

Persoas físicas	1.857.931
Sociedades anónimas	113.130
Sociedades de responsabilidade limitada	1.145.398
Sociedades cooperativas	24.516
Sociedades colectivas	333
Sociedades comanditarias	93

Fonte INE

## 4.2.2. Aspectos comúns a todas as sociedades.

- ▶ Unha sociedade é unha **persoa xurídica**. A sociedade ten personalidade distinta á dos seus socios.
- ▶ As achegas dos socios constitúen o **capital social**. Estas achegas poden consistir en diñeiro ou ser non monetarias (un ordenador, unha máquina, un camión,...).
- ▶ Os socios e socias son os propietarios da sociedade en proporción ao que achegaron a ela. Como propietarios teñen dereito a decidir sobre as cuestións que afectan á sociedade. O **órgano de deliberación e decisión** é a **XUNTA XERAL** que é a reunión dos socios. É obrigatorio que se reúna, polo menos, unha vez ao ano e son convocadas polos administradores.
- ▶ As sociedades han de ser administradas. A administración das sociedades comprende os actos de **xestión** (refírense ao ámbito interno da entidade: decisións sobre organización, deseño de políticas comerciais, investimentos a realizar, etc.) e de **representación** (relacións da sociedade con terceiros: sinatura de contratos, accións xudiciais, etc.). Os **ADMINISTRADORES** son nomeados e cesados pola xunta xeral. Pode ser unha soa persoa, varias persoas que actúan conxuntamente, varias persoas que actúan independentemente ou un consello de administración.
- ▶ Hai unha serie de **requisitos** xerais necesarios para a **constitución**:
  - 1º Solicitud de **CERTIFICACIÓN NEGATIVA DE DENOMINACIÓN SOCIAL** ao **REXISTRO MERCANTIL CENTRAL**<sup>1</sup>. É un certificado que proba que non existe outra sociedade coa mesma razón social.
  - 2º Pagar o **IMPOSTO DE TRANSMISIÓNS PATRIMONIAIS E ACTOS XURÍDICOS DOCUMENTADOS** (ITPAJD), polo 1% do capital social.
  - 3º Outorgar **ESCRITURA PÚBLICA DE CONSTITUCIÓN** (ante NOTARIO). É un documento que expresa a vontade dos socios de crear a sociedade, os ESTATUTOS SOCIAIS, pactos entre socios,...
  - 4º Inscribir a sociedade no **REXISTRO MERCANTIL** correspondente ao domicilio da sociedade. Ao rexistrarse a sociedade adquire personalidade xurídica.

Escritura de constitución	Estatutos da sociedade
Denominación dos socios e a súa vontade para crear a sociedade.	A denominación da sociedade.
Os estatutos que rexen o funcionamento da sociedade.	O obxecto social ou actividades a que se dedicará a sociedade.
As achegas que os socios se obrigan a aportar.	Data de comezo das actividades e duración da sociedade.
A denominación dos administradores.	O domicilio social.
<b>Estatutos</b>	O capital social.
Os demais pactos que desexen incluír.	A estrutura do órgano de administración.
...	...

<sup>1</sup> Rexistro Mercantil Central, en Madrid, [www.registromercantil.com](http://www.registromercantil.com)

## 5. A sociedade colectiva.

A sociedade colectiva é unha sociedade mercantil na que todos os seus socios, actúan baixo un nome común ou razón social, achegan capital e traballo ou só este último, nos termos en que se comprometeran, para conseguir o fin social marcado e responden de forma subsidiaria, persoal, solidaria e ilimitadamente das obrigas contraídas pola sociedade.

As **características** principais da sociedade colectiva son:

- É **personalista**. Importancia da persoa dos socios (tanto económica como persoal).
- **Responsabilidade ilimitada**, que significa que a responsabilidade é:
  - **Persoal**: responden das débedas sociais co seu patrimonio persoal.
  - **Subsidiaria**: os acredores primeiro han de ir contra o patrimonio da sociedade e unha vez esgotado este, os socios responden co seu patrimonio persoal.
  - **Solidaria**: cada socio pode chegar a responder do total da débeda, é dicir, o acredor poderase dirixir ao socio que queira e esixirlle a este a totalidade da débeda (non só a parte proporcional).
- Número mínimo de socios: dous.
- Capital: non existe un mínimo.
- Denominación social: está composto polo nome de todos os socios ou dalgún/s deles seguida das palabras “**e compañía**” ou a súa abreviatura (**e Cía**).

É, polo tanto, unha forma xurídica adecuada cando se trata de poucos socios cun alto grao de implicación destes pero cunha gran responsabilidade. Hai moi poucas.

## 6. A sociedade comanditaria: simple e por accións

A sociedade comanditaria pódese considerar como unha evolución da sociedade colectiva, aínda que hoxe en día ambas as dúas son formas xurídicas pouco frecuentes debido á responsabilidade ilimitada dos socios colectivos.

É unha sociedade personalista e capitalista: ten socios colectivos (personalista) e comanditarios (capitalista). Como mínimo haberá dous socios; un colectivo e outro comanditario.

Socios <b>colectivos</b>	Responden <b>ilimitada, subsidiaria e solidariamente</b> das débedas da sociedade (igual que na sociedade colectiva). Participan na xestión da sociedade.
Socios <b>comanditarios</b>	Responsabilidade <b>limitada</b> ás súas achegas. Están á marxe da xestión e actividade produtiva da empresa. Só buscan obter dividendos.

As sociedades comanditarias poden ser de dous tipos: **Sociedade Comanditaria Simple** e a **Sociedade Comanditaria por accións**. A diferenza básica é que na segunda, o capital está dividido en accións (como nas SA) mentres que na primeira non.

## 7. A sociedade anónima (S.A.)

A sociedade anónima é unha **sociedade mercantil** constituída por **un ou máis socios**, que no seu **conxunto achegan un capital (en diñeiro ou especie) non inferior a 60.101,21 € dividido en accións**. Os socios **non responden persoalmente das débedas sociais**.

Vexamos as súas **principais características**:

- Están reguladas pola **Lei de Sociedades Anónimas**.
- A responsabilidade dos socios é **limitada á súa achega**.
- É unha sociedade **capitalista** e **aberta**, pois calquera persoa pode ser socia, sen máis requisito que a adquisición de accións.
- Número mínimo de socios: un. Neste caso a sociedade adquire condición de sociedade anónima unipersoal (S.A.U.). Cando se adquire a condición unipersoal, deberase constar expresamente a identidade do socio único na inscrición da empresa e en toda a documentación mercantil (facturas, correspondencia, etc.).
- Capital social: non pode ser inferior a **60.101,21 €** e está dividido en **accións** (partes alícuotas en que se divide o capital da S.A.) que son **libremente transmisibles**. O capital deberá estar desembolsado polo menos nun 25%.
- Denominación ou **razón social**. Pode adoptar calquera nome acompañada da expresión **Sociedade Anónima (S.A.)** ou no seu caso **S.A.U.**
- Trámites xurídicos: certificación negativa de denominación, escritura pública e inscrición no Rexistro Mercantil.
- Os órganos sociais: A S.A. ten dous órganos fundamentais que se encargan do cumprimento dos seus fins, do seu funcionamento e, no seu caso da súa liquidación. Estes son:
  - **Xunta Xeral de Accionistas**: está constituída polos accionistas, que toman por maioría as decisións da empresa. Esta Xunta pode ser ordinaria (reúnese dentro dos 6 primeiros meses do ano) ou extraordinaria e, en ocasións universal.
  - **Administradores**: encárgase da administración, xestión e representación da sociedade. O nomeamento dos administradores corresponde á Xunta Xeral de Accionistas. Pode ser unha única persoa ou un Consello de Administración. Non é necesario que sexan socios.


### Algúns conceptos importantes relativos ás accións:

A acción é un concepto clave para entender o funcionamento das S.A.

- A acción é a **parte alícuota do capital social**, é dicir, son partes iguais e indivisibles do capital social **das sociedades anónimas**. Nas S.A. o capital social atopa dividido en accións.
- A acción é un **valor negociable**: Isto significa que incorpora unha serie de dereitos e obrigas para os accionistas:

<b>Dereitos</b>	Económicos	<p>Dereito aos <b>dividendos</b> (parte dos beneficios da empresa que se reparte para cada acción).</p> <p>Dereito á <b>parte</b> proporcional do patrimonio resultante en <b>caso de liquidación</b> e peche da sociedade.</p> <p>Dereito <b>preferente de subscrición</b> na emisión de novas accións (tendo en conta que o número de accións novas a que ten dereito o accionista antigo debe ser proporcional ao número de accións que posúe)</p>
	Políticos	<p>Dereito a <b>votar</b> na Xunta Xeneral de accionistas</p> <p>Dereito de <b>información</b> (a inspeccionar os documentos contables antes da Xunta Xeral que os aprobe)</p> <p>Dereito a <b>impugnar</b> acordos sociais.</p>
<b>Obrigas</b>	O deber básico dos accionistas é o de achegar o capital.	

As accións como valores negociables teñen valor económico (xa que confire dereitos económicos) a acción é transmisíble (pódese vender, doar ou deixar en herdanza).



Cando falamos do valor dunha acción, podemos referir a:

- **Valor nominal:** resultado de dividir o capital social entre o número de accións, é o valor literal da acción que aparece no documento, polo que é fixo.

$$\text{Valor Nominal} = \frac{\text{Capital Social}}{\text{Número de accións}}$$

- **Valor teórico ou real:** é resultado de dividir o patrimonio real da empresa nun determinado momento entre o número de accións. Non é fixo, senón que varía ao longo da vida da empresa.

$$\text{Valor Teórico} = \frac{\text{Patrimonio Neto}}{\text{Número de accións}}$$

- **Valor de mercado.** Se a empresa está admitida en Bolsa, este valor de mercado chámase cotización. A súa maior ou menor cotización dependerá da oferta e da demanda en Bolsa.

Se o Valor nominal > Valor efectivo  $\Rightarrow$  Cotización baixo a par

Se o Valor nominal < Valor efectivo  $\Rightarrow$  Cotización sobre a par

Se o Valor nominal = Valor efectivo  $\Rightarrow$  Cotización á par

As accións represéntanse mediante **títulos** ou por medio de **anotacións en conta**. Un título é un documento físico. Unha anotación en conta é unha anotación na que se reflicte o número de accións que posúe cada socio e as sucesivas transmisións. Con este sistema de anotacións trátase de rexistrar de forma áxil a tenza e transmisión de accións e así evitar o pesado manexo de títulos. Por iso, hoxe en día os títulos os empregan só as pequenas SA.

As accións poden ser **nominativas** (accións que asignan expresamente o nome do propietario) ou ben **ao portador** (o dono é a persoa que as posúa).

## 8. A sociedade de responsabilidade limitada (S.R.L. ou S.L.)

Hoxe esta é o tipo de sociedade máis frecuente. Polas súas características é especialmente adecuada para a pequena e mediana empresa (PEME).

A **sociedade de responsabilidade limitada** ou **sociedade limitada** é unha **sociedade mercantil** que pode ser **constituída con un ou máis socios**, que achegan en conxunto un **capital mínimo de 3.005,06 €, dividido en participacións** sociais iguais, acumulables e indivisibles. Os socios **non responden persoalmente de as débedas da sociedade**. Son sociedades **cerradas**.

As **características principais** da sociedade limitada son:

- Están reguladas por la Lei de Sociedades de Responsabilidade Limitada.
- É unha sociedade **capitalista**, aínda que ten algunhas connotacións de sociedades personalistas, como veremos.
- Responsabilidade dos socios: **limitada á súa achega**.
- Número mínimo de socios: un. No caso dun único socio constituirase como sociedade de responsabilidade limitada unipersoal (S.L.U.).
- O capital non pode ser inferior a **3.005,06 €** e está dividido en **participacións** (alícuotas) que **non son libremente transmisibles**. A transmisión da propiedade está suxeita a limitacións. Por iso, se dí que é unha sociedade **cerrada**. O capital deberá estar **totalmente desembolsado**.
- Denominación (razón social): pode adoptar calquera nome acompañado da expresión Sociedade Limitada (S.L. ou S.R.L.).
- Trámites xurídicos: certificación negativa de denominación, escritura pública e inscrición no Rexistro Mercantil.
- Os órganos sociais:
  - **Xunta Xeral de Socios**: está constituída polos socios, que toman por maioría as decisións da empresa. Como mínimo deberá convocarse dentro dos 6 primeiros meses do ano.
  - **Administradores**: encárgase da administración, xestión e representación da sociedade. O nomeamento dos administradores corresponde á Xunta Xeral de

Socios. Pode ser unha única persoa ou un Consello de Administración. Non é necesario que sexan socios.

### As participacións.

O capital social dunha SL está dividido en partes alícuotas (iguales), acumulables e indivisibles) chamadas participacións. En ningún caso poden denominarse accións e non son negociables.

Las participacións outorgan aos seus donos unha serie de dereitos (participar nos beneficios, votar na xunta de socios, a informarse,...). Pero a transmisión das participacións está limitada notablemente pola Lei de S.L. Por iso, as SL non poden cotizar en Bolsa.

PRINCIPAIS DIFERENZAS ENTRE ACCIÓNS E PARTICIPACIÓNS	
ACCIÓNS (S.A.)	PARTICIPACIÓNS (S.L.)
Son libremente transmisibles, salvo pacto estatutario	En principio non son libremente transmisibles
Desembolsadas polo menos nun 25%	Desembolsadas ao 100%

## 9. Sociedade Limitada Nova Empresa

A **Sociedade limitada Nova Empresa (SLNE)** é un tipo de sociedade limitada que apareceu fai pouco.

Está especialmente pensada para emprendedores e autónomos que queiran expandir ou consolidar a súa actividade.

Vexamos algunhas das súas características:

- ▶ É un tipo de SL, polo que o capital está dividido en participacións e a responsabilidade dos socios ante as débedas da sociedade está limitada ás súas achegas.
- ▶ O capital mínimo non varía respecto ao de Sociedade limitada en 3.012 euros pero estableceuse o **máximo é de 120.202 euros**. En todo caso o capital só pode estar composto por **achegas de diñeiro**.

<b>SLNE</b>	Mínimo: 3.012 € e Máximo: 120.202 €	Achegas de diñeiro
<b>SL</b>	Mínimo: 3.012 € e non hai máximo	Achegas de diñeiro ou bens

- ▶ Os socios: o número de socios **máximo** que pode haber é de **cinco** na constitución e non hai mínimo. Os socios deben ser **persoas físicas**.

<b>SLNE</b>	Máximo <u>5 Socios</u> na constitución	<u>Non admite sociedades mercantís</u> como socios
<b>SL</b>	Non hai máximo	Os socios poden ser <u>persoas físicas</u> ou sociedades

- ▶ A denominación de a sociedade está formada polos dous apelidos e o nome dun dos socios fundadores máis un código alfanumérico que facilita a administración e a expresión SLNE. Por exemplo: *López García, Juan 000009090A, SLNE*.

- O **obxecto social é xenérico**, para abranguer multitude de actividades e ser máis flexible. Isto permite desenvolver varias actividades empresariais sen ter que cambiar os estatutos da sociedade.
- É obrigatorio que os administradores da Sociedade (que poden ser un ou varios) sexan socios da SLNE.
- Tramitación: un dos avances máis positivos da lei é a posibilidade de **tramitación telemática**. A constitución telemática permite un considerable aforro de custes, viaxes e trámites. Tan só é necesaria a visita ao **punto de Asesoramento e Inicio de Tramitación (PAIT)** e ao notario. Isto permite a constitución da SLNE en moi poucos días (de 2 a 7).

## 10. As sociedades laborais (S.A.L. e S.L.L.)

A sociedade laboral é unha sociedade anónima ou limitada na que a **maioría do capital social pertence a os traballadores cunha relación laboral por tempo indefinido e a xornada completa**.

Pode haber dous tipos de socios:

- Socios traballadores: aportan capital e teñen un contrato e traballo indefinido e a xornada completa. Polo menos debe pertencerlles o 51% do capital.
- Demais socios: aportan capital pero non traballan para a sociedade ou o fan con outro contrato (temporal, a tempo parcial).

O número de **socios non pode ser inferior a tres**, pois ningún socio pode posuír máis do 1/3 do importe do capital, salvo que se trate de Entidades Públicas.

Poden ser de dous tipos: Sociedades Anónimas Laborais (S.A.L.) e Sociedades limitadas Laborais (S.L.L.).

Estas sociedades deben cumprir *uns requisitos especiais de constitución*: certificación negativa de denominación, escritura pública; inscrición no **Rexistro de Sociedades Anónimas Laborais da Comunidade Autónoma correspondente** e inscrición no Rexistro Mercantil.

Están reguladas pola **Lei de Sociedades Laborais** e, supletoriamente pola Lei de SA ou pola Lei de SL, respectivamente.

Na súa razón social debe aparecer o termos “Sociedade Anónima Laboral” ou a súa abreviatura “S.A.L.” ou “Sociedade Limitada Laboral” ou a súa abreviatura “S.L.L.” segundo o tipo de sociedade laboral.

Axudas e subvencións: Ao igual que as cooperativas, as Sociedades Laborais teñen bonificacións e exencións en algúns impostos, ademais da concesión de axudas como redución de xuros nos préstamos, axudas para la formación dos traballadores, etc.

## 11. As sociedades cooperativas (S. Coop.)

A cooperativa é unha sociedade constituída por persoas que se asocian, con capital variable, en réxime de libre adhesión e baixa voluntaria, para a realización de actividades empresariais, encamiñadas a satisfacer as súas necesidades e aspiracións económicas e sociais, con estrutura e funcionamento democrático.

Non **son sociedades mercantís** ao non pretender lucro senón satisfacer as necesidades comúns dos seus membros.

As dúas clases de cooperativas máis representativas son as cooperativas de primeiro grao e cooperativas de segundo grao.

Nas de primeiro grao, os socios han de ser persoas físicas ou xurídicas como por exemplo as cooperativas de traballo asociado, de consumidores e usuarios, de vivendas, agrarias, de seguros, de ensino, de crédito, etc., mentres que as de segundo grao, se constitúen, en xeral, por dúas cooperativas (cooperativas de cooperativas).

Aínda que hai unha lei estatal, a **Lei Xeral de Cooperativas**, a Comunidade Autónoma de Galicia ten transferida a competencia para regular este tipo de sociedade, polo que se promulgou a **Lei de Cooperativas de Galicia** que introduce algunhas leves modificacións con respecto á lexislación estatal, coa finalidade de adaptarse á realidade da economía galega.

As características principais da sociedade cooperativa son:

1. É unha sociedade aberta pois existe **libre adhesión e baixa voluntaria** dos socios.
2. O seu **capital é variable** (aumenta coas achegas dos novos socios e diminúe coa saída). As achegas estarán inicialmente desembolsadas, polo menos, nun 25%.
3. A **responsabilidade** do socio polas débedas sociais estará **limitada ás achegas** ao capital social, salvo que nos estatutos se indique expresamente a responsabilidade ilimitada dos socios.
4. **Estrutura e xestión democrática.**
5. Denominación social: nome acompañado de Sociedade Cooperativa ou ben S. Coop. Agora ben, se a cooperativa ten o seu domicilio en Galicia, as palabras a engadir serán "**Sociedade Cooperativa Galega**" ou a súa abreviatura "**S. Coop. Galega**".
6. Número de socios: as cooperativas de primeiro grao deberán estar integradas, como mínimo, por **tres** socios mentres que as de segundo grao estarán constituídas por, polo menos, dúas cooperativas.
7. Trámites xurídicos: certificación negativa de denominación (emitido polo rexistro de cooperativas), escritura pública e **inscrición no Rexistro de Sociedades Cooperativas.**

#### Órganos sociais:

##### - **Asemblea Xeral.**

É a *reunión de todos os socios e asociados* (se existen) para tomar acordos como órgano de expresión da vontade social.

##### - **Consello Reitor.**

É o *órgano colexiado de xestión e representación* da cooperativa, que actúa segundo o acordado pola Asemblea.

##### - **Interventores.**

É o **órgano de fiscalización**. Está formado por un, dous ou tres socios e encárgase de censurar as contas anuais.